

ԱՐՁԱՆԱԳՐՈՒԹՅՈՒՆ

«ՀՀ Սյունիքի մարզի Տերտերասարի ոսկու հանքավայրի վերագնահատման նպատակով երկրաբանական ուսումնասիրության 2024-2026թթ. աշխատանքների» ծրագրի հանրային քննարկում

ՀՀ Սյունիքի Մարզ, Մեղրի համայնք, գ. Լիճք
29.03.2024թ.

2024թվականի մարտի 29-ին՝ 17:00-ին ՀՀ Սյունիքի մարզի Մեղրի համայնքի Լիճք բնակավայրի վարչական ղեկավարի նստավայրում տեղի ունեցավ «ՀՀ Սյունիքի մարզի Տերտերասարի ոսկու հանքավայրի վերագնահատման նպատակով երկրաբանական ուսումնասիրության 2024-2026թթ. աշխատանքների» ծրագրի հանրային քննարկում:

Քննարկումը վարում էր Մեղրի համայնքի ղեկավար Բ. Զաքարյանը, ներկա էին համայնքի ղեկավարի տեղակալ Խ. Անդրեասյանը, Լիճք բնակավայրի վարչական ղեկավար Հ. Հովհաննիսյանը, «Պրո Կոնստրակտ» ՍՊԸ (Նախաձեռնող) տնօրեն Ն. Գևորգյանը, երկրաբան Մ. Հարությունյանը և համայնքի բնակիչներ (մասնակիցների ցանկը՝ ստորագրություններով, և տեսաձայնագրությունը կցվում են արձանագրությանը):

Բացման խոսքով հանդես եկավ Մեղրի համայնքի ղեկավար Բագրատ Զաքարյանը: Նա նշեց, որ ի պատասխան Նախաձեռնողի տնօրենի հանրային քննարկման կազմակերպման հայտի՝ օրենքով սահմանված կարգով, համապատասխան փաստաթղթերը հրապարակվել են տարբեր էլ. Հարթակներում, փակցվել են նախատեսված վայրերում, համայնքի գյուղական բնակավայրերի վարչական շենքերում, Ագարակ և Մեղրի քաղաքներում:

Այնուհետև Բագրատ Զաքարյանը խոսքը փոխանցեց Նախաձեռնողի տնօրեն Ն. Գևորգյանին: Գևորգյանը հանդես եկավ ողջույնի խոսքով, շնորհակալություն հայտնեց ներկաներին և ներկայացրեց ծրագրով նախատեսվող աշխատանքների հիմնական բնութագրերը:

Նա նշեց, որ հանքը գործել է մինչև 2012թ., իսկ վերջին գնահատումը կատարվել է 2003թ.-ին, սակայն էլ. բազայում չկա պահպանված որևէ տվյալ, ուստի անհրաժեշտություն է առաջանում թարմացնել տվյալները, կատարելու փորձնական հանույթ, հասկանալու համար հետագայում հանքը տնտեսապես ձեռնտու է լինելու, թե՛ ոչ:



Հարությունյանը, նշեց, որ ռիսկային ներդրում է արվելու, քանզի աշխատանքներ պետք է կատարվեն վերագնահատման նպատակով, այնուհետև պարզ կլինի արդյունավետությունը՝ հաշվի առնելով ոսկու շուկայական գնի տատանումները: Շարունակելով՝ Հարությունյանն ասաց, որ Նախաձեռնողը պատրաստ է համագործակցել համայնքի ղեկավարության հետ, կատարել սոցիալական ներդրումներ խոշորացված համայնքում, ինչպես նաև՝ հնարավորության սահմաններում լուծել մի շարք համայնքային խնդիրներ:

Այնուհետև սկսվեց հարցուպատասխան

Արշավիր Հայրապետյանը (մասնակից) հարցրեց, թե որտեղ է գտնվելու հանքահորը:

Բագրատ Զաքարյանը շեշտեց, որ և՛ Կառավարությունը, և՛ համայնքը կտրականապես դեմ են բաց հանքերի շահագործմանը, այդ պատճառով հանքը գործելու է փակ:

Մանվել Հարությունյանը նշեց, որ հետագա կատարվելիք աշխատանքները ստորգետնյա եղանակով են ընթանալու, ծրագրով չեն նախատեսվում պոչամբարների կառուցում:

Մասնակիցներից Սարգիս Սարգսյանին հետաքրքրեց դատարկ ապարների(отвал) հարցը, թե մշակումից հետո որտեղ են լցվելու դրանք:

Ի պատասխան Մանվել Հարությունյանը տեղեկացրեց, որ նրանք ճիշտ մոտեցում են ցուցաբերելու դատարկ ապարներին, աշխատելու են ստորգետնյա փլվածքներով, վերընթացների, վարընթացների միջոցով: Իսկ հետագայում օրենքով սահմանված կարգով տեղ կհատկացվի լեռնահատկացում (горный отвод): Ստանալով թույլտվություն Կառավարությունից՝ դատարկ ապարների համար այլընտրանքային լուծումներ են առաջարկվելու, օրինակ՝ կոպիճի կամ այլ շինանյութի ստացում:

Ավագանու անդամ Արարատ Թումանյանը հարցրեց.

1. - Որքա՞ն կտևի հետախուզական աշխատանքը
2. - Որտե՞ղ է իրացվելու պատրաստի պրոդուկտը, ներքին թե արտաքին/միջազգային շուկայում:

Հարցին պատասխանեց Նարեկ Գևորգյանը.



-Եթե հարցին նայենք բիզնես տեսանկյունից, հաշվի առնելով շուկայում գինն ու մնացած հարաբերակցությունները, ապա տնտեսապես ավելի շահավետ շուկայում կսպառենք,- հավելելով,- Հայաստանյան շուկան խիստ սահմանափակ է:

Ա. Թումանյանը հարցրեց, թե արդյոք արտաքին շուկա դուրս գալու դեպքում խոչընդոտներ չե՞ն լինի, ինչին Նարեկ Գևորգյանը բացասական պատասխան տվեց:

Վերագնահատման աշխատանքների մասով նշեց, որ ընթանալու են 2024-2026թթ.:

Գյուղի բնակիչներից Խաչիկ Ալեքսանյանը ողջունեց հետագա հանքի շահագործումը, առաջարկելով օգտակար լինել գյուղական բնակավայրերին:

Վերջում Մանվել Հարությունյանը, ամբողջացնելով ինֆորմացիան, նշեց, որ բացառվելու են պոչամբարները/խվոստները: Սկզբնական նպատակը տվյալների թվայնացումն է, նաև պարզելը, թե արդյոք հավաստի են եղել ժամանակին կատարված նմուշները և նոր տեխնոլոգիաների պայմաններում կատարվող անալիզների արդյունքները:

Ավարտելով լսումը՝ Բագրատ Զաքարյանը նշեց, որ հանքարդյունաբերությունը պետության ֆինանսական հենասյուններից մեկն է և շատ կարևոր՝ հզորանալու համար:


Տեղեկացրեց, որ դեռ լինելու են հանրային լսումներ մասնագետների հետ՝ վերոնշյալ թեմայով:

Շնորհակալություն հայտնեց ներկաներին մասնակցելու և ժամանակ հատկացնելու համար:


Ընդունելով, որ մասնակիցները տալիս են իրենց դրական կարծիքը՝ հանրային լսումը համարվեց փակված:

Հանրային քննարկումների պատասխանատու,

Մեղրի համայնքի ղեկավար՝

 Բ. Զաքարյան

Նախաձեռնողի ներկայացուցիչ՝

 Ն. Գևորգյան

